

Մարտիրոս Թօքատեանի՝ նախաձեռն ճարտարութիւններով :

Դժբաղդաբար ամուրի ծերութեամբ մը զրաւեց իր կեանքը՝ կտակելով իր ունեցածն (150000 լիւրայի չափ) ու գործերը քոյրերուն եղբայրներուն և քեռորդիններուն, որոյ հայրագիրն ալ եղած էր իր երէց քրոջն հետ : Իր մարմինը փառաւոր յուղարկով Անգղիայէն փոխադրուեցաւ և թաղուեցաւ Կ. Պոլիս :

Կարծենք՝ բարեհամբաւ Յակոբեանց մէկ եղբայրն ալ նախագործած է իրրեւ զրագիր Պէշիքթաշեանց քով, և ապա երկու եղբարք՝ Միքայէլ և Յովհաննէս՝ երկար աշխատութեամբ և մանրավաճառութեամբ՝ յաջողած են հիմը դնել այն բարի ու փառաւոր առևտրական տունին, որ կը շարունակէ ցարդ իրենց որդւոց ձեռքով : Յակոբեան Միքայէլ՝ կըսեն՝ Կ. Պոլիսի հրապարակին վրայ գործի արծի՛ւ մըն էր և Յովհաննէս Յակոբեան՝ Մանչէսթըրի հրապարակին վրայ և առտնին կենցաղի մէջ՝ սո՛ւրբ մը. անշուշտ այս բարեմասնութիւնք պատճառ եղան իրենց տեւական մեծութեան և հզօր անունին... :

Ըստ այսմ՝ մինչև 1860 Կ. Պոլիսի և անոր միջոցով, Պրուսայի, Զմիւռնայի, Ադրիանուպոլիսի, Նիկոմիդիայի ու Կեսարիայի հրապարակներուն վրայ կազմուած էին տասնեակ մը մանիֆաթուրայի վաճառական հայ տուներ՝ մինչ յոյներն <sup>(1)</sup> ալ հետզհետէ տեղի կուտային մանիֆաթուրայի՝ մանաւանդ պասմայի ու ամբրիգանի՝ հրապարակէն, ամփոփուելով աւելի՛ հաստատուն, աւելի՛ կոկիկ սեղանաւորական և արմտիքի գոր-

(1) Կ. Պոլիսի Յոյնք այն ատեն ալ՝ ինչպէս հիմայ՝ հարստութեանց ընդարձակ գործառնութեանց և բարեգործութեանց կողմէն չէին հասներ Միչերկրականի ու Եգէական կղզիներուն և Եգիպտոսի մեծ յոյներուն կարողութեան :